

**حمرة علت وجه السما لاعظم مصيبه
بدموع من دم تمطر سيول رهيبه**

غابت شمس عاشر على دموم او مناخر
سبعين جثته مطبره ترضها الحوافر
متوزعه اشلاها تعالينها الحرارير
فوك الصعيد امذبحة بدمها خضيبه

أرجاس ما عدهم رحم عسكر أميّه
باعوا ذممهم واشتروا بيها الدنيّه
سووا مجازر في أراضى الغاضريّه
لا ما كفاهم واهجموا بخدر النجيبه

جيش الكفر شب ناره بدار النساوين
فروا حيارى باليتامى الملجى لا وين
مذعوره تتصايح او تنثر مدمع العين
مدهوشه واليه انذبح وسط الحريبه

طبّوا خيمهم واحرگوها وفرهدوهم
هتكوا سترهم واشتموا حيدر ابوهم
ذوله عزيزات النبي گسوه اضربوهم
هاموا حواسر والوجد يسعر لهيبه

وگفت خوات حسين يمه يبچوا اعليه
شافوه مگطوع النحر ممدوده رجليه
عاري وثيابه مسلبه او گعدوا حواليه
صارت مناحه وانگبض گلب الغريبه

تخاطب أخوها تگله حاجيني يرجواي
حالك شعبني يا خليصي وذوب احشاي
انياط گلبي تگطعت يا نور عيناي
تبجي وصدرها اعله الجسد عالي نحيبه

ضجّت بناته وارتموا فوگه ينوحون
لا راس عنده تمنّوا بگربه يموتون
سوّوا عزّيه اعله الصدر ظلّوا يلطمون
حنّوا على حاله ومدامعهم سكيبه

گالوا يعمّه راح ابونه ماله اردود
لاذوا بحجرها يندبونه بگلب ممرود
گطعوا الظنّه من الأبو وایام لسعود
أحلامهم کلها على الغيره تريبه

يبن امي نادت زينب تنخي بكسيره
إدرکنا طحنه بشدّه يا والي العشيره
ثگل الحمل يصعب علي وآني أسيره
بمشي يخويه حسين مسبيّه وسائبه